

N. 169.

~~S. 138~~³

S
169

38

(Riserre)

S. 169

Ex Libris ludouicq le Vasseur

Apr. 889

5 pièces ou mémoires
de Guy de la Brosse
contenant son projet
de construction d'un
jardin pour cultiver
les plantes médicinales
vers 1636 ou plutôt
sans ind. de l. m. d.



A MONSEIGNEUR
LE CHANCELIER.



MONSIEUR,

Le dessein de la construction d'un Jardin Royal pour la culture des Plantes Medicales, proposé au Roy, & accordé par sa Majesté à Monsieur Heroard son premier Medecin, pour le faire edifier en l'extremité de l'un des Fauxbourgs de Paris, où il sera trouué le plus commode, & en auoir la Sur-intendance: Demande outre la volonté de sa Majesté, l'appuy des ames genereuses de son Conseil telle que la vostre, car sans vostre charitable support quelque louable que puisse estre l'entreprise, il est impossible qu'elle soit effectuée. Je suis nommé à sa Majesté par Monsieur Heroard pour en auoir la charge, & pour donner ordre à la culture de ces Plantes, c'est ce qui me donne la hardiesse de vous presenter ces lignes de tres-humble supplication, d'auoir la proposition agreable, & de l'appuyer de vostre pouuoir.

Versé en tout, vous ne pouuez ignorer de quelle importance est la connoissance des herbes; Et qu'encores que tous les ouurages de la Nature soient objects de la Medecine operatiue, qu'elle se serue des Mineraux, entrailles de

la terre, & des Animaux; toutesfois les Vegetaux tiennēt le premier rang en son vſage. Sa prattique a commencē par eux; & les infirmitēz ont receu la premiere guerifon de leurs vertus. Meſmes auant qu'elle fuſt redigēe en Art, maintes indispoſitions ont eſtē combatuēs par leurs propriētez. Et comme ils ſont les plus anciens aliments de l'homme; il y a de l'apparence que ſe ſentant trauaillē de maladies, qu'il a pluſtoſt jettē ſon œil, & porté ſa main ſur les Herbes ſes familiares; cherchant en elles du ſecours, que ſur les Mineraux, que la terre luy receloit dedans ſon ventre, & que ſur les Animaux deſquels il n'auoit encore fait eſſay; au moins le Ciel protecteur de ſes mouuemens, luy en pouuoit bien donner autant de connoiſſance qu'au reſte des ſenſibles. Car les brutes qui n'ont pour conduite qu'un inſtinct & un iugement du ſens, s'adreſſent ſans autre inſtruction aux Plantes propres à la cure de leurs maux, & s'en ſeruent heureuſement à leur beſoin; voire les hommes ont appris l'vſage de quelques vnes d'elles. Les oyſeaux de proye tirent volontiers l'Abſinthe pour ſe refaire la mollette; Pareux, ce croy-je, les Alemans ſe ſont inſtruits de ſa valeur; Ils en compoſent un vin pour prendre à l'entrēe du repas, afin d'ayder à la digeſtion, Les meſmes oyſeaux, principalement les Eſperuiers, ont donné le nom à l'herbe ſurnommēe de l'Eſperuier, parce qu'ils en vſent pour ſ'eſclaircir les yeux. La Muſtelle a fait connoiſtre que la Ruë eſt excellente contre les venins. Les Herondelles cherchent la grande Eſclaire pour la veuē, laquelle on met en vſage à meſme eſſect. Le Serpent ſe ſubtilie les yeux par le Fenoil reconneu pour ophtalmique. Le Cerf bleſſē mange le Dictame, duquel on ſe ſert pour les playes. Bref il y a tres-peu de brutes qui n'ayent recours à quel-

3

ques plantes pour en tirer du soulagement. A plus fort terme, l'homme le pourrat'il faire, soit par nature ou par experience, que le iugement & la raison conduisent.

Tant de diuersitez, que le curieux remarque parmy elles, tesmoignage de leurs differentes vertus, & l'ordinaire seruice qu'il en recoit, le doiuent auoir porté au desir de les connoistre, & de temps en temps d'augmenter son apprentissage pour s'y rendre Maistre. Les gros volumes qu'il a compilez de leurs histoires semblent comme prouuer cela; Et qu'il en a plus de science & d'vsage que tout le reste des animaux. Aussi est-ce par elles qu'il met en prix l'art de Medecine, ne pouuant faire paroistre la verité de ses preceptes, que par leurs plus puissantes qualitez; pour le moins fournissent elles à la meilleure part.

En vain diroit-on que les contraires guerissent leurs contraires, si les vegetaux accommodez à cet axiome n'en monstroient l'effect. Car que feroit-ce de la Medecine sans les Plantes? que seruiroit la connoissance des maladies, de leurs causes & accidens sans remedes? Les sciences sont vaines qui n'ont point d'application; Et les arts tres-inutiles qui ne rendent aucun ouurage. Il faudroit estre de l'opinion de Platon pour les estimer, & auoir l'esprit rempli d'Idées pour ne cherir que la contemplation. Tous les siecles qui l'ont fuiuy, n'ont pas blasme comme luy Archimede d'auoir mis en prattique ses belles conceptions, & qu'une main crasseuse & mercenaire ait eu l'vsage de ses inuentions. Les plus sains esprits de nos âges, asseurent que toutes les sciences doiuent suiure la condition des causes dont elles prennent le nom; qu'elles doiuent tendre à quelque action vtile, autrement qu'elles sont de pures mocqueries. Si la Medecine estoit seulement contem-

platiue, elle n'apporteroit non plus de fruit à la nature humaine, que la recherche de la quadrature du cercle, ou que la commune mesure du diametre du quarré à son costé. Mais de toute autre intention que ces imaginations, apres auoir curieusement discoursu des maladies; elle enseigne la maniere de les guerir; & propose les remedes; voire elle les prepare; cherchant les meilleurs & les plus asseurez dedans la famille des Vegetaux; & par leur moyen reestablit la santé alterée; monstrant, toute glorieuse par tels ouurages, que ses Theoremes sont vrayz.

Pour ceste cause, les premiers Medecins reconnoissans que les Plantes estoient les principaux outils de leur art, tant pour conseruer la santé presente que pour rappeler l'absente, se sont efforcez de s'instruire de leurs vertus par les premieres, secondes & troisiemes qualitez; des vnes par les sens, & de la derniere par l'experience. Mais encores qu'ils se soient des long temps occupez à cette tasche, si ne l'ont ils finie; Et cela, pour deux causes; La premiere, parce que les premieres & secondes qualitez ne descouurent pas quelles sont les troisiemes qui releuent de la propriété de toute la substance; Les sens sont mousses à telle descouuerte: La seule experience y peut satisfaire. C'est elle qui a descouvert que la Rhubarbe purge la cholére: Le Senné la melancholie, & le Turbit le flegme. L'autre que l'on s'est trop amusé à ce peu qu'en ont cogneu les anciens sans passer plus outre, & bastir vn nouveau temple à Æsculape, pour receuoir les iournelles experiences d'un chacun, afin que recueillies par quelque vertueux & docte Medecin, Elles fussent meurement considerées, & puis enseignées. Car la vie estant courte, l'art long, & l'experience perilleuse, vne seule main ne peut suffire à tel ouurage

5
mais plusieurs employées à ce dessein, eussent d'une douce façon essayé ce que les deuanciers ont oublié. Que sçait-on si tant de racines, tiges, escorces, fueilles, fleurs, fruiçts, semences, gommcs, larmes, & sucz inconnus de vertu, ne contiennent point les remedes des plus fascheuses maladies, voire de celles que l'on iuge incurables? Dieu & la Nature ne font aucune chose inutilement. A l'auenture la goutte rencontreroit-elle quelque remede: L'epilepsie seroit elle allegée, la Lepre guerrie, & l'Hydropisie desséchée. Maintes herbes portent le tiltre de la cure de tels maux dedans leurs histoires, que personne n'essaye. Est-ce pas vne grande lascheté, que de plus de deux mille Plantes dont nous auons la description, l'on ne se fert que d'environ trois cens, encores assez chetiuement; comme si la Nature les produisoit en vain, ou seulement pour vn embelissement de la terre? Mesmes de celles qui croissent en nos champs à l'ombre de nos bois & au frais de nos eaux, il n'y en a pas la vingtiesme partie en vsage, sinon parmy les villageois qui en connoissent beaucoup, desquelles ils se seruent avec heureux succès, & quelquefois à la honte du docte Medecin qui n'aura peu guerir vne infirmité dont ils viendront à bout.

A ces deux inconueniens, deux autres ont succédé: Le discord des Authcurs traittans de ce sujet, & la negligence des Professeurs de la Medecine. Les vns ont nommé & figuré vne plante diuerfement: Les autres en disputent les qualitez & proprietéz: De sorte que l'on a beaucoup de peine à sortir de telles difficultez. Mathiole Commentateur de Dioscoride, ne s'accorde pas avec les Moynes, ny avec Fusch, Monard, Lobeles, Dodonée, Pena, Valerius Cordus, Castor Durand, Tragus, Leonicer, Turnicer,

Clusius, Gesner, Dalechamp, & autres ne conuiennent
 tousiours entr'eux : Ils discordent encores souuent avec
 Pline & Theophraste, & pour la diuersité des Descri-
 ptions, il arriue de grandes erreurs en la composition des
 remedes : car ne trouuans ce que les anciens enseignent,
 l'on prend des substituez ; Mais les compositions chan-
 gées par tels ingrediens, ne respondent aux promesses de
 leurs Autheurs, ny à l'esperance que l'on en attend.

Quant à la nonchalance de plusieurs Medecins, Ell'est
 telle que si bien tost il n'y est pourueu, la Medecine s'en
 va fan-dessus dessus, & toute perduë. Les paresseux se
 contentent de ce qu'ils ont trouué en l'Art, voire delaiss-
 sent plusieurs excellens remedes des vieux Docteurs,
 pour vouloir guerir toutes les infirmitéz du corps hu-
 main par la Seignée & avec le Senné, rapportans tous les
 preceptes de la Medecine à l'vsage de ces deux remedes,
 faisans par ce desordre iniure à Galien qui nous a laissé de
 gros volumes de la description des medicaments simples
 & des composez selon les parties, à Mesué & à toute la
 troupe des plus iudicieux esprits du vieil temps. Car si la
 Seignée & le Senné peuuent remedier à toutes les maladies
 de l'homme, Galien & ceux qui l'ont fuiuy à l'enseigne-
 ment de si grand nombre de medicaments, estoient de
 vrais Triacleurs, ou bien s'ils ont obey au bon Genie de la
 Medecine, ceux qui ne les imitent, sont ou ignorans, ou
 meschans & imposteurs, & sont à guise des mauuais ou-
 rriers qui n'ont que deux outils pour leur Art, où il en fau-
 droit cent. La Medecine operatrice n'est pas comme les
 autres arts, qui terminez, ont vn certain nombre d'outils.
 Les siens sont sans nombre, selon les causes conneuës & les
 ocultes des maladies, & de leurs diuers accidens. Car encor

que Galien ait dressé ses Theoremes à la façon des Mathematiciens , afin d'en mieux & plus facilement tirer ses conclusions , que les causes internes des infirmités soient seulement plethorie , inanition, ou cacochimie : Que le sang, la pituite, & l'une & l'autre bile en leur défaut,abondance ou deprauiation, soient tousiours les causes antecedentes des indispositions du corps del'homme, soit que l'on regarde les qualitez, soit que l'on ait esgard à la substance morbifique, si faut-il plus que ces deux remedes. Qu'ils autorisent tant qu'il leur plaira leur opinion par la definition de la Medecine selon Hypocrates, & qu'ils disent avec luy que ce n'est qu'addition & soustraction, ne proposans que deux intentions en la cure des maladies. Ilseront vaincus par luy mesme au liure *De Arte*,où il asseure que les medicaments lasehans & resserans ne sont suffisans au recouurement de santé, qu'il faut bien d'autres remedes pour rendre l'Art recommandable, que la Seignée & le Senné. Aussi Galien entre les Grecs, Aui-cenne entre les Arabes, & encore les Hebreux & Latins, nous proposent infinis moyens pour paruenir à ces deux intentions, iusques à nous descrire des compositions appropriées aux maladies & aux parties: De là viennent ces noms, Cephalic, Pectoral, Bechique, Cardiaque, Hepatique, Histerique & autres. En quoy paroist que la pratique de Medecine, differente de tous les autres Arts, doit auoir vn tres-grand nombre d'instruments, & si besoin est enin- uenter tous les iours, pour les nouuelles maladies naisantes par chaque reuolution de siecle.

Tout le monde le sçait & chacun l'espreuue, que l'homme a plus d'infirmités que tous les autres animaux ensemble. Il est Epileptique avec l'Elan & la Pie, Vertigineux

avec le Mouton & le Bouc , Il souffre la Squinancie avec le Bœuf; la fieure & la palpitation de cœur avec le Cheual & le Lyon. Il est plus gouteux que tous les animaux salaces , plus graueleux que les Oyseaux de Proye , plus ladre que le Porc , le Pigeon & le Lièvre , voire plus enragé que le Chien & le Loup. Et que ces indispositions différentes demandent diuers remedes, Elles les demandent d'autant plus qu'elles ne se guerissent sans medicaments , & que les douleurs negligées & les infirmités sans remedes s'augmentent & croissent de moment à autre , qui pourroient receuoir guerison par les remedes mesprizez & par ceux encor que l'on mesconnoist. Car il est à presumer que l'Art fondé sur la Nature n'est point vain, parce que ceste mere de l'Vniuers n'est pas marastre iusques à ce poinct de nous affliger , ou elle-mesme d'estre affligée en nous sans nous secourir, ou estre secouruë par nombre de bons & faciles medicamens qu'elle contient , mais que nous ignorons , & que nostre nonchalance nous cache. La Science, dit Aristote, s'apprend des contraires, La Vertu est cōueüe par le vice, la Prudence par la folie, & la Santé par la maladie. Or la santé se doit procurer par des moyens contraires aux causes & aux accidens des indispositions , Et ces moyens doiuent estre en Nature , comme il est necessaire par la raison des contraires & d'elle en l'Art, d'où il s'enfuit qu'ils sont seulement inconnuez , Et pour en iouyr qu'il les faut chercher. Et où plus prochainement & seurement qu'és Plantes?

Mais comment les chercherons nous en ses sujets sans les connoistre? Et comment les cognoistre sans les pratiquer? voire comment les pourrons nous pratiquer sans les auoir?

C'est

C'est pour cela que je propose la structure d'un Jardin Royal pour cultiver les Plantes Medicinales, auquel tout le monde ait recours à son besoin. De ses produits nous pourrons tirer quelque lumiere pour nostre dessein; mesmes avec le temps, l'on peut esperer de luy mille belles & bonnes choses.

Pour le rendre assez accomply, il faut qu'il contienne toutes les Plantes que luy fourniront la France, l'Italie, l'Espagne, l'Angleterre & l'Alemagne, voire des pays plus reculez. Car qu'est-il impossible à l'Art fauorisé d'un grād Roy? Il doit estre de bonne grandeur, afin que de chaque espece, l'on en puisse esleuer nombre pour l'vsage. Ce seroit chose de peu de consideration de les tenir singuliers pour la seule connoissance, & non en multitude pour l'vsage & pour l'experience. A l'adventure par son moyen la Medecine sortira-t-elle de son desordre; Et sans aller chercher aux Indes des remedes inconnuez & hazardeux, elle y trouuera la Rhubarbe au frangula, le Titimal laurier pour le Turbit ou plustost turbit luy mesme; l'herbe terrible de Narbonne, qui est l'Empetron de Galien, pour le Senné; les Prunes pour la casse; le Nerprun pour les hermodates, l'Absinthe pour l'aloës, le Concombre sauuage pour la coloquinte, & plusieurs Plantes domestiques, tant catartiques que cardiaques & de tres-rares vertus. Car c'est vne grandissime erreur de croire que la Nature ait despourueu nostre Region des remedes propres aux infirmités naissantes avec nous, ainsi le Nappel croist avec l'Anthere.

Hypocrates prattiquant la Medecine entre les Grecs ne leur propose pour medicaments que les Plantes croissans dans leurs terres: aussi les domestiques sont-elles plus con-

neuës & de meilleur vſage que les eſtrangeres. La plus grand' part des vilageois ſe gueriffent de faſcheuſes langueurs par les herbes de leurs prez, pouſſans ſous leurs bois, & ſe nourriſſans dedans leurs guérets. Le feu Roy Henry le Grand rencontra ſur les montagnes de Sauoye, vn vieillard de ſix vingts ans; le voyant tres-ſain & diſpos en tel âge, ſ'enquit de luy de ce qu'il auoit fait pour arriuer à ceste ſaiſon, & ſi ſainement; Il monſtra à ſa Majeſté vne plante dont il vſoit tres-ſouuent, & luy donnoit tout plein de louanges; portée qu'elle fut à feu Monſieur de la Riuiere ſon premier Medecin, & ſingulier en la connoiſſance des Simples, reconneut que c'eſtoit l'Elebore de Theophraste. Galien auouë qu'un païſan luy a enſeigné quelques vertus & vſage de la fumeterre. Vn pitaut me monſtra il y a quelque temps la Ciguë, m'aſſurant qu'elle luy auoit redonné la veuë: Depuis l'ayant pratiquée pour ſemblable mal, qu'il m'auoit deſcrit en ſon lourdois, i'en reconneus la verité, & apperceu en cela l'vtilité de cette herbe. Le meſme ſieur de la Riuiere ſe ſeruoit du ius de cette Plante eſpoiſſi avec oppoponax, & appliqué en emplatre contre les duretez de la ratte. Apres luy j'ay ſuiuy cette pratique tres-heureuſement. Il n'y a pourtant aucun Autheur qui ait parlé de telles vertus de la Ciguë. Ainſi ſ'apprennent mille & mille belles & bonnes proprietéz des Vegetaux, inconnuës aux anciens, & dont les liures ne traittent en aucune maniere. Que ſi tout ce qui eſt ignoré eſtoit decelé, la Medecine en ſeroit de beaucoup illuſtrée, au moins ſi tout n'eſt compris en l'vſage du ſenné.

Outre telles vtilitez, on en tirera encores ces autres tres-neceſſaires; que l'on aura à toutes heures des plantes

recentes selon les saisons, ou sechées, apres auoir esté cueil-
lies en âge & temps conuenable & tres-soigneusement
gardées en quaiſſes bien nettes, l'on ne fera plus obligé
d'en prendre de pourries & de fanées faute de meilleures,
comme les debitent les petits herbiers des halles, qui ven-
dent la berle pour le cresson, & qui font secher leurs her-
bes apres les auoir longuement gardées mouillées & tra-
cassées sans les vendre, & qu'elles sont presque en fumier
pour les debiter l'Hyuer à ceux qui en ont besoin. Peu es-
chappent cette misere. L'escolier en Medecine y viendra
reconnoistre les sujets dont la science qu'il veut professer
se sert pour prouuer la verité de ses maximes. L'apotecai-
re y trouuera des plantes & vertes & seiches, bien conser-
uées, qu'il a negligé de serrer. Et encores le curieux estran-
ger y pourra venir se satisfaire, remportant en son pays le
souuenir de mille raretez estallées en ce Iardin.

Or sa disposition sera telle, que toutes les Plantes y
seront placées au plus pres de leur lieu natal, soit bas ou
haut, sec ou humide, ombragé ou descouuert, autant
que se pourra estendre la puissance d'un Art qui se veut
efforcer d'ayder à la Nature, & de luy rendre un Zenit
estrange fauorable. Il sera donc en douce pente expo-
sé au Leuant & Midy, ayant en son milieu une Monta-
gnette artificielle de la hauteur de neuf à dix toises &
d'un arpent de contenu, creuse en son ventre & ouuer-
te au Sud en demy-lune, afin de mieux receuoir & gar-
der la chaleur du Soleil. C'est pour reseruer en Hyuer les
Plantes estrangeres qui craignent le froid, & pour culti-
uer à son orée celles qui demandent le chaud. En son
sommets seront plantées celles qui cherchent le haut.
Es enuironz se verra une eau courante finissant en un

4

marais pour les Plantes palustres, aux costez seront deux petits bocages de demy arpent chacun, l'un taillis au levant, & l'autre de haute fustaye au couchant, pour les herbes croissans à l'ombre & au frais. Le descouuert fera pour le reste diuisé en parterres, friches & prez separez par allées, plantées de diuers arbrisseaux. Toutes ces parties peuuent estre comprises en vingt ou vingt-cinq arpens de terre, situez à l'extrémité d'un des fauxbourgs, afin d'auoir l'air libre, & que les vapeurs des cloaques, & les fumées des cheminées, ne desrobent la rosee aux Plantes, l'un de leurs principaux aliments. Cett' œuvre estant Royale, doit estre fermée de murailles de neuf pieds de haut du rez de chaussée, accompagnée d'un bastiment conuenable à sa grandeur & aux offres suiuanes.

Car outre cette disposition & la culture, le propose pour l'vtilité publique de conseruer les racines, tiges, bois, escorces, feuilles, fleurs, fructs & semences de tout ce qui croistra en ce Iardin, chascue chose cueillie en âge & temps propre, seichée à l'ombre & gardée en quai-fes bien nettes & fermées, pour cela il faut vne gallerie de cinquante toises de long.

De tenir de toutes les eaux distillées simples que les Autheurs commandent & plus: lesquelles eaux seront distillées en vaisseaux qui ne leur communiqueront aucune qualité, de sorte qu'elles ne sentiront l'empireisme; & aussi de telle condition qu'elles ne seront nullement sujettes à se corrompre ny à faire flegmes, ainsi que les ordinaires, quand bien on les garderoit vingt années, voire mesmes beaucoup plus efficaceuses que les vulgaires.

De tenir & tirer des Plantes les essences vsageres en la Medecine.

De preparer les sels des Vegetaux que la pratique admet; mesmes ceux de toutes les Plantes dont les eaux seront distillées, & celuy de plusieurs bois & escorces.

De conseruer de tous les sucz que l'on doit garder aux boutiques des Apoticairez & plus; les renouuellant tous les ans.

De faire tous les ans vn ample memoire des nouuelles descouuertes des vertus des Plantes, & des Plantes nouuelles, s'il s'en rencontre que les deuanciers n'ayent conneuës ny descriptes, lequel je porteray au premier Medecin de sa Majesté. A quoy seront aussi obligez mes suiuaus.

De faire leçon des Plantes deux iours de la semaine, à commencer du premier iour de May & finir au dernier iour de Septembre.

De lire tous les ans vn cours de l'Art distilatoire, duquel ie feray imprimer vn *Compendium*, promettant de faire faire toutes les operations qu'il descrira.

Et aux curieux de la connoissance des Astres pour la rapporter à la Medecine, je liray vn Abregé Astrologic, selon l'argument analytique que j'ay descrit. Par son moyen ie donneray intelligence du liure de *De cubitu ex Mathematica scientia*, attribué à Galien & du *Yatromathematica* d'Hermes. Ces deux liures seruent grandement pour la connoissance des iours critiques; Et le tout seruira à expliquer en partie le liure de *Cælo*, d'Hypocrates, autrement de *Aëre, aquis & locis*.

Tugez maintenant, Monseigneur, si ce Iardin est vtile, & si ce que i'offre pour l'accompagner est necessaire. C'est vne partie de mon Talent. Qui offre ce qu'il a, offre assez.

14

Que si telles propositions, & ce que ie sçay d'ailleurs de la science & de l'art de Medecine que ie professe, meritent par vostre iudicieuse connoissance, que ie soy' fauorisé au dessein de la construction de ce Iardin, Vous obligerez le public, & vostre tres-humble seruiteur. Le Roy en fera beny de son peuple: Et encores vous, cherissant vn tel ou-
rage, aurez les benedictions deuës au Tresor de la santé, que par ce moyen vous ouurez à vn chacun. Au moins deuez-vous esperer que les ames bien nées & retournees en la saine iouyssance de leurs corps, par les fruiçts de ce Iardin, vous donneront pareilles louanges qu'à leur bien-
facteur. Outre ces meritez applaudissemens, vous rece-
urez encore le loyer du vertueux, le contentement d'a-
uoir fait vne action tres-louable & tres-necessaire; Car c'est le propre de la vertu de rencontrer en elle-mesme, la recompense de son travail. Obligez donc s'il vous plaist le public.

Si vous m'obiectez ores, que ce dessein ne sçauroit s'ac-
complir sans vn fonds, & que les finances du Roy ne
peuvent maintenant estre diuerties, quand la chose fe-
roit mille fois plus vtile. Je repars à cela, que ie n'enten
aussi tirer les deniers que ie demande de l'Espargne de
sa Majesté, la somme de cent dix mil liures qu'il con-
uient pour l'achapt de vingt ou vingt-cinq arpents de
terre, pour la closture, bastimens, recouurement des
plantes, achapt des vaisseaux & vstenciles necessaires
aux operations, & Douze mille liures de Reuenue an-
nuel pour l'entretien de douze hommes, six desquels
vacqueront par la campagne, & aux païs estranges, pour
la recherche des Plantes; quatre des autres six cultiueront
le Iardin, & les deux restans traouilleront aux distilla-

tions ; peuuent estre pris sur quelque aduis , que pour
cela je desire proposer à sa Majesté, que trouuerez iuste,
afin qu'elle ordonne que le fonds que ie demande pour
l'ouurage , y soit pris. C'est la tres-humble supplica-
tion


MONSEIGNEVR,


De vostre tres-humble & tres-obeyssant
seruiteur, GUY DE LA BROsse.

22
tions : peuvent estre pris sur quelque aduis, que pour
cela ie desire proposer à la Majesté, que trouuerex iuste,
auiant qu'elle ordonne que le fonds que ie demande pour
l'ouvrage, y soit pris. C'est la tres-humble suppli-
cation

MONSIEUR,

De vostre tres-humble & tres-obéissant
seruiteur, GUY DE LA BROSSE.







1762
894

8

4
RÉS



